

REGLUGERÐ

um desemberuppbætur til þeirra sem fá greiddar maka- eða umönnunarbætur á árinu 2025.

1. gr.

Gildissvið.

Reglugerð þessi gildir um desemberuppbætur í desember 2025 til þeirra sem hafa fengið greiddar maka- eða umönnunarbætur á árinu 2025.

Tryggingastofnun annast framkvæmd reglugerðarinnar.

2. gr.

Desemberuppbætur.

Einstaklingur sem hefur á árinu 2025 fengið greiddar maka- eða umönnunarbætur skv. 5. gr. laga um félagslega aðstoð, nr. 99/2007, á rétt á desemberuppbót að fjárhæð 66.291 kr., enda hafi viðkomandi fengið mánaðarlegar greiðslur allt árið 2025.

Einstaklingur sem hefur fengið greiddar maka- eða umönnunarbætur skv. 5. gr. laga um félagslega aðstoð, nr. 99/2007, skemur en tólf mánuði á árinu 2025 á rétt á hlutfallslegri desemberuppbót skv. 1. mgr. í samræmi við þann tíma sem hann hefur fengið greiðslur á árinu. Miða skal við 1/12 fyrir hvern mánuð.

3. gr.

Útgreiðsla.

Tryggingastofnun skal greiða út desemberuppbætur samkvæmt reglugerð þessari eigi síðar en 15. desember 2025.

4. gr.

Gildistaka.

Reglugerð þessi, sem sett er samkvæmt heimild í 2. mgr. 14. gr. laga um félagslega aðstoð, nr. 99/2007, öðlast þegar gildi. Frá sama tíma fellur úr gildi reglugerð nr. 1484/2024, um desemberuppbætur til maka- og umönnunarbótaþega árið 2024.

Félags- og húsnæðismálaráðuneytinu, 24. nóvember 2025.

Inga Sæland.

Ásgeir Runólfsson.